

Premier Evelyn Wever-Croes:

Biblioteca tin un rol importante den e trabaonan di digitalisacion di e servicionan di gobierno



ORANJESTAD (AAN): Prome Minister Evelyn Wever-Croes tabata un invitado special durante e ceremonia di celebracion di 75 aña di Biblioteca Nacional.

DIARIO a entrevista e mandatario kende a expresa cu un biblioteca den tur pais ta un instituto hopi importante y ta un centro caminda tin hopi conocimiento y hende ta



yega pa haya mas conocimiento. "Biblioteca Nacional a demostra esey na Aruba tambe cu 75 aña di existencia", a bisa.

Tin cu enfoca riba e trabao grandi cu a wordo haci pero tambe e trabaonan futuro. Mi ta mira cu biblioteca tin un rol den e trabaonan di digitalisacion di servicionan di gobierno. Mas y mas gobierno ta bay digitalisa y awo caba pa haya paspoort tin cu aplica online y no tur hende tin computer, acceso of sa con pa hacie. Den e caso aki biblioteca tambe ta yuda nan.

Premier Wever-Croes a declara cu ey nan e ta mira un papel hopi importante cu biblioteca ta haci caba pa yuda tambe den e servicionan aki cu mas y mas ta bay digitalisa.

Biblioteca ta un lugar unda e hendenan ta sinti nan mes safe, caminda por haya un bon servicio, un ambiente hopi calido ora di drenta den e edificio. Por mira con a cambia e entrada y a hacie un luga calido y ameno. Esey sigur lo contribui na mas hende cu kier acudi biblioteca.

"Pa mi ta un honor pa ta akinan pa celebra cu nan mas cu ta un rato pa gradici nan, pasobra e trabao y e importancia di e instituto no ta di un edificio ta di e hendenan cu ta traha den die. Cu a traha,



cu ta trahando y cu lo bay haci nan trabao y ohala cu Dios bendiciona nan pa nan por sigui hacie",

Prome Minister a finalisa bisando.

Un logo nobo pa Biblioteca



ORANJESTAD (AAN): Dia 20 di augustus ta celebra '75 aña trabou di biblioteca na Aruba'. Biblioteca Nacional Aruba ta un biblioteca multifacetico den sentido cu e ta un biblioteca publico cu ta presta buki y duna informacion na publico, un biblioteca cu ta sostene scolnan, un biblioteca nacional cu ta conserva patrimonio cultural di Aruba y un lugar unda ta sostene y promove expresionnan cultural.

Trabou di biblioteca na Aruba a desaroya durante añanan como tambe e forma pa warda/conserva material. Biblioteca a crece hunto cu e comunidad Arubano y ta posiciona su mes fuertemente den cuadro di educacion continuo pa tur.

Pa expresa e crecimiento, ambiente, conex-

ion cu comunidad a rebiba e logo. Muy en particular e Font y e colornan. E forma a keda mes cos, como cu esey ta hopi conoci caba. E blokinan ta representa lomba di buki y un mundo di buki y informacion. E logo ta diseña na un manera, pa apela na tur grupo meta.

E blokinan: ta expresa cu Biblioteca ta yuda construi y contribui na un comunidad bon informa. Pensa por ehempel na construccion di un Centro di Informacion completo, contribui na engrandecimento en general y contribui na informa tur miembro di comunidad.

E letranan ta duna un efecto fluido, habri, flexibel y suave. E colornan ta moderno, yen di energia, bibo y ta hala atencion.

Diasabra awor futbolistanan femenino di Aruba lo tene nan Parada di Campeon



ORANJESTAD (AAN): E seleccion di Aruba cu di U-15 cu recien a titula champion di e competencia regional di CONCACAF teni na Merca, lo bay tin nan Parada di Victoria.

DIARIO a haya sa cu esey lo socede Diasabra cuminsando pa 11:00 am for di dilanti di Bestuurskantor na Playa.

Prome cu esey, entre 10:00 am y 10:45 am, ey nan mes lo tin un ceremonia unda Ministro di Deporte lo duna reconocimiento na cada uno di e atletanan aki cu a sa di sobresali y hiba number di Aruba na halto.

Ruta di Parada: E parada pues lo sali pa 11:00 am, y lo bay pariba pasa banda di Linear Park, sigui bay te na Spiral Rotonde dilanti Aeropuerto, bay pa barrio di Dakota, pasa despues den Playa cu Klip, sigui pa Rotonde di Sero Blanco, sigui pa Madiki, Ponton, y yega Rotonde Tanki Flip, sigui bay nort pasa dilanti Centro Deportivo Frans Figaroa, sigui pa Rotondé di Noord, bay pa Highrise Hotelnan, sigui pa Kudawecha, pasa door di Jaburibari, yega te Rotonde Paradera, y aki tuma direccion Santa Cruz pa finalisa na Urutaka.

Tur hende ta ser pidi pa decora nan auto, y uni cu e Parada pa asina honra Team Aruba y Team All Stars.